



提金牌

今年个奧運在日本東京舉行，臺灣个選手在舉重、羽毛球兩隻比賽項目得著金牌，也有在舉重、羽毛球、空手道、體操、射箭、拳擊、柔道、桌球、跆拳道、高爾夫球等比賽項目得著銀牌、銅牌，加起來總共有十二埗獎牌，係臺灣參加奧運以來，成績最好个一擺。

難得奧運在離臺灣恁近个日本東京來舉行，原且當多人有按算愛在比賽期間打工過去日本，臺灣个選手加油，最尾，受到新冠疫情个影響，大家嘅無法度前往，好得還有電視做現場个轉播，分關心臺灣選手表現个人，做得在電視面前來加油！佢屋下乜共樣，係知有臺灣選手愛出場个時節，總係會目金金掌等電視來睇比賽，係選手有好表現，全家人就呵天嘍地，係選手有毋堵好，大家就唉唉唧唧，歸家人个心情跔等選手上上下下，一直愛到比賽結束，正有好放冗。睇恁多選手比賽，當然最希望个，還係有機會做得睇著臺灣選手有好成績，提著金牌，企上頒獎臺个最高坎，因為，選手係代表國家參加比賽，選手得著光榮，臺灣人乜會跔等歡喜。

毋過講實在，選手愛在奧運提著金牌，哪有恁該！因為，奧運係最高等級个運動比賽，逐隻國家就會派出最好个選手來參加，所以，競爭定著激烈，選手想愛贏人，除忒自家愛有條件以外，還愛有好教練、訓練環境个配合，乜做得講，現代个運動比賽，毋係選手个人个比賽定定，係歸隻國家運動資源个比賽，運動選手係愛經過長期个培養，正會有好表現，毋係隨講就有，還愛有好个出路，正會錫著好个人才肯來打拚，難怪會有人講，體育就像國力。

臺灣恁多年來，運動个風氣緊來緊盛，戶外、社區、學校，輒常做得睇著運動个人，肯贊助運動比賽个企業乜緊來緊多，歸隻運動環境進步盡遽，毋過，主要還係倚恃政府个資源、渡頭，運動風氣普遍个國家相比，大體係在私人个運動社團方面有兜無共樣。這兜國家个人，盡多在下班後就會去參加運動社團，攞興趣共樣个伴共下運動，像這擺奧運得著細妹自行車公路賽金牌个奧地利選手，佢本身係一個數學家，因為對騎自行車有興趣，就自家練習、參加比賽，做得講，先有運動風氣以後，自然就會有好个選手。

運動選手在奧運提著金牌，對 佢來講係當大个鼓勵，一方面係當好个國家宣傳，另外一方面係分自家个人民較有自信。雖然，金牌儕儕想愛，但係，乜做毋得變成發展運動个唯一目標，還係先愛鼓勵大家來運動，先有運動人口，正會有運動選手，從基礎做起，變成傳統習慣，選手正會像長流水樣，永永遠遠有機會提金牌，企上頒獎臺个最高坎。

作者：林伯殷

☆詞彙學習☆

【目金金】mug` gim` gim`：睜大眼睛看的樣子。

【放冗】biong` ngiung`：放鬆。

【呵天嘍地】ho` tien` lag` ti`：發出巨大的聲音，在此喻為巨大的歡呼聲。

【渡頭】tu` teu：帶頭。

【唉唉唧唧】ai` ai` zid` zid`：嘆息聲，也可比為哀聲嘆氣。

【長流水】chong liu fi`：流動不停的溪水，在此喻為長長久久。